

Politik ver za vourderretn keing de koruzion va de Provinz va Trea't

Policy en punkt 5.2 van gasetz UNI ISO 37001

(artikl 5 van draijoregen plan ver za vourderretn keing de koruzion ont ver de durchsichtekait 2023-2025 va de Autonome Provinz va Trea't)

“No de stöttgasetzn de verregln van lönt ont van öndern lander, ont noch sèll as ist patschrim en draijoregen plan ver za vourderretn keing de koruzion ont ver de durchsechenkait va de Autonome Provinz va Trea't ont en verhòltenkodex, u'ganommen pet aurot va de provinzal Junta n. 1217 van 18 van heibeger 2014, de Provinz kònt nèt u'nemmen de korruzion en òlla de sai'na virm.

Iberhaup, noch de òrbet - as men ist nocht za tea' oder de sèll as men mu' tea' - van innricht ont as enteressiart der Dinst, de politische ibernemmer miasn nèt hom an iatn vurm za tea' bou as kimmp vòlsch praucht sèll as men mu' tea', ver za kriang dirèkt oder nèt dirèkt, a'ne va bou as men ist, an personal nutz (va gèlt oder nèt va gèlt) ont iberhaup de miasn nèt:

- opfern, verhoasn, gem, zoln, derlam öndra za gem oder zoln, dirèkt oder nèt dirèkt, nèt rèchta nutz, birtschòftnutzn van an iats gilt ont öndra praich, gor nèt birtschòft, en an drittegen (as s ist an òllgamo'offiziar, oder u'stellt van òllgamo'dinst oder an privat) abia unterstizt oder zuazol, ver za tea' oder nèt tea' dinger noch de òrbet van an iatn, a'ne schaug va bou as kimmp de offer ont der plòtz bou as de drittegen òrbetn;
- vrong oder u'nemmen, oder derlam an drittegen za vrong oder u'nemmen, dirèkt oder undirèkt, nèt rèchta nutz, birtschòftnutzn van an iats bèrt oder öndra nutz, nèt va gèlt aa, van a drittegen (an privat oder, s meichet, an òllgamo'uffiziar oder an U'stellter va òllgamo'dinst) abia unterstizt oder zuazol ver za tea' oder nèt tea'

eppes as de aigene òrbet u'riart, a'ne schaug der plòtz bou as gem oder tschenk kimmp ont der plòtz bou as de drittegen oder ber as kriak òrbetn.

S sai' derzua verpoutn de dinger as men tuat keing en gasetz ont as pesser tschrim sai' en draijoregen plan ver za vourderretn keing de koruzion ont ver de durchsichtekait va de Autonome Provinz va Trea't ont en Verhòltenkodecks.

Gea' keing en de regln as en de doi policy tschrim sai', billt song gea' keing en Draijoregen Plan ont en verhòltenkodecks, ober derzua meichet trong de Autonome Provinz va Trea't ont de sai'na kontrolliartn oder toalgenommen bèrkn za kriang strovn, ont en an gònz schlèchten aussichttschicht.

No en prinzip "zero tolerance" de Autonome Provinz va Trea't lòk nèt ausna'm en de regln ont verpiatn as en de doi Policy tschrim sai'. Men unterstraicht as s denken as men tuat s ver en guat va de sèlber Provinz ist nèt a skis ver za tea' dinger as keing en de prinzipn as oum tschrim sai' gea'.

De autonome Provinz va Trea't schiap de u'stelltn za tea'se schubet derklorn benns hòt vrong ont za songs en iberschauer. De autonome Provinz va Trea't versichert as de u'stelltn scheltn nèt kemmen stroft, vort tschickt, òndra òrbet mòchen, stillt, vort tschicken oder diskriminiart en an iatn vurm ver za hom nèt rècht gatu', aa benns no en doi hòts gahòt gèlt oder nèt gèlt sòchen ver de autonome Provinz va Trea't, ont nanket ver za hom gameldet, a'ne moa'n za tea' schlècht, keing s gasetz va de koruzion oder va de Policy.

Der "dinst va glaihkait ver za vourderretn keing de koruzion" as tschrim ist asn punkt 5.3.2 asn gasetz UNI ISO 37001 ist ibergem, en de organizazion provinzal iberschauer ver en vourderretn ont ver de durchsichtekait va de autonoma Provinz va Trea't, as hòt de autoritet ont de vraiekait patschrim as de gasetz. Iberhaup, ver en sèll as keart de autoritet men kann sechen as, s mensch as kimmp u'gamèllt abia iberschauer ver en vourderretn ont ver de durchsichtekait kònn - abia toalnehmer van direttivorgl, as s ist de provinzal Junta, oder abia va de hoa regiar, as s ist der òllgamoaviarer - miast rècht tea' de òrbet va konformitet. Ver de sèlbstendekait, s ist nèt moglech as s mensch u'gamèllt schellt sai' drinnzouchen dirèkt en de

òrbetn va de autonome Provinz va Trea't pet an hoachen risk va koruzion.

Za riven, de autonome Provinz va Trea't versichert de moglechkaitn ver za noschaung en vourderretn keing de koruzion ont s de vernaiern, no en sèll as paschraip der draijoregen plan ver za vourderretn keing de koruzion, van provinzal gasetz keing de koruzion ont de durchsichtekait, gèltsgott en stende drauschaung ont en òlls sèll as men miast tea''.